



Stručna služba općinskog vijeća i općinskog načelnika

Broj: 01/1-02-2471/19
Ilijaš, 27.11.2019. godine

PRIJEDLOG

Z A P I S N I K

sa 36. (tridesetšeste) sjednice Općinskog vijeća Ilijaš, održane dana 27.11.2019. godine, sa početkom u 10:00h.

Tridesetšestom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMERović
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	-
16	ELDAR ŠEHIĆ
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	GS
19	EDHEM HASANOVIĆ
20	-
	SAMOSTALNI VIJEĆNICI
21	-
22	-
23	MUHAMED HANDŽIĆ
24	ALMIR ŠPIODIĆ
25	MEHO DŽINDO

Odsutni vijećnici:

1. Alan Šerak
2. Asim Mujić
3. Semir Dizdarević i
4. Besim Gljiva

Prisutni gosti:

1. Radio Ilijaš – Aida Kevrić-Muratović
2. Samra Ramić – predstavnik OSCE-a
3. Elmin Brkić – predsjednik Savjeta MZ Luka
4. Benjamin Redžo – predsjednik Savjeta MZ Stari Ilijaš
5. Mehmed Smajlović – predsjednik Savjeta MZ Mrakovo
6. Kenan Hasić – predsjednik Savjeta MZ Ilijaš Grad
7. Volonter: Nedim Balta

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Merima Osmanović – pomoćnik načelnika
4. Sadeta Brkić – pomoćnik načelnika
5. Nijaz Spahić – pomoćnik načelnika
6. Zdravko Barić – pomoćnik načelnika
7. Aziz Fazlić – pomoćnik načelnika
8. Sanja Zagorac-Jozić – pomoćnik načelnika
9. Ilda Kahriman – sekretar OV-a Ilijaš
10. Nermina Lemezan - stručni saradnik za informisanje
11. Maida Habibović – zapisničar

ALMA OMEROVIĆ – predsjedavajuća

Otvorila sjednicu i konstatovala da je prisutan 21 vijećnik, te da postoji kvorum za odlučivanje.

Zapisnik sa 35. sjednice dala je na razmatranje. Primjedbi na zapisnik nije bilo, pa je OV-e jednoglasno usvojilo zapisnik sa 35. sjednice OV-a.

Pročitala je predloženi dnevni red i dala na razmatranje.

MELIHA AVDIBEGOVIĆ – pomoćnica načelnika

Sa dnevnog reda povlačim tačku 7. Prijedlog Odluke o pristupanju izradi Regulacionog plana "Luke" obzirom da je Služba napravila previd. Naime, prije donošenja ove Odluke, potrebno je zatražiti mišljenje Ministarstva za prostorno uređenje Kantona Sarajevo i to je po novom Zakonu o prostornom uređenju i mi već primjenjujemo te članove o strategijskoj procjeni o uticaju na okoliš. Znači, po dobijanju ovog Mišljenja, vjerovato će trebati uraditi tu Strategiju i svi ti elementi ugradiće se u ovu Odluku.

Obzirom da više nije bilo prijedloga i primjedbi na predloženi dnevni red, Općinsko vijeće je jednoglasno usvojilo sljedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 35. sjednice
3. Informacija o izvršenju Budžeta općine Ilijaš za period 01.01.30.09.2019. godine
4. Nacrt Budžeta općine Ilijaš za 2020. godinu
5. Nacrt Odluke o izvršavanju Budžeta općine Ilijaš za 2020. godinu
6. Prijedlog Odluke o davanju saglasnosti za zaključenje Sporazuma o privremenom korištenju Gradskog nogometnog stadiona u Ilijašu
7. Nacrt Odluka o:
 - a) usvajanju Regulacionog plana "Apartmansko naselje Mrakovo 1" – Ilijaš
 - b) provođenju Regulacionog plana "Apartmansko naselje Mrakovo 1" – Ilijaš
8. Prijedlog Rješenja o:
 - a) razrješenju člana Komisije za izbor i imenovanje
 - b) izboru člana Komisije za izbor i imenovanje
 - c) razrješenju člana Komisije za administrativne poslove, budžet, privredu, finansijska i ekonomska pitanja
 - d) izboru člana Komisije za administrativne poslove, budžet, privredu, finansijska i ekonomska pitanja
9. Informacija o stanju privrede, poljoprivrede i samostalnog privređivanja.

AD-1

Vijećnička pitanja i inicijative

MIRZA BEKTIĆ – vijećnik SDA

Inicijative:

1. Pokrećem inicijativu prema izvođaču radova Vizija d.o.o. Visoko da na reciklažnom dvorištu u Ilijašu pored JKP "Vodostan" Ilijaš, izvrši sanaciju i nasipanje bankine na lokalnom putu Ilijaš-Kadarići koja je oštećena prilikom izvođenja radova. Prilikom izgradnje reciklažnog dvorišta vršen su iskopi temelja potpornog zida neposredno uz dionicu puta Ilijaš-Kadarići, a koji nisu dovedeni u prvobitno stanje. Obzirom da je velika frekvencija pješaka i vozila koji dolaze i odlaze iz naselja Kadarići kao i činjenica da u naselju postoje i posluju privredni subjekti, smatramo shodno da se sanacija izvrši u što kraćem roku. Uz sami potporni zid prilikom izvođenja radova izvođač radova je napravio vještačku branu oborinskim vodama i prilikom svake kiše stvara se velika bara koja blokira put i pri tome otežava kretanje pješaka i vozila. Smatram da bi iskopavanje kanala na lijevoj strani puta u pravcu Kadarića navedeni problemi riješili.
Nakon ove moje inicijative firma Vizija d.o.o. izvršila je nasipanje lijeve strane odvodnog kanala uz sami potporni zid reciklažnog dvorišta čime je onemogućeno da voda teče prema rijeci Bosni navedenim kanalom. Tražim od općinskih službi i od navedene firme da se postave rigoli za odvodnju vode kako bi se trajno riješio ovaj problem.
2. Pokrećem inicijativu prema JP "Željeznice FBiH" Sarajevo da na pružnom prelazu Alića rampa izvrše sanaciju postojećih tastera za pješake (pored pekare). Prilikom prelaska ljudi i učenika koji gravitiraju prema Kadarićima, postojeći taster već duži vremenski period nije u funkciji, pa zahtjeva što hitniju sanaciju.

Inicijativa koja je poslana na prošloj sjednici OV-a Ilijaš i po istoj nije ništa urađeno na regulaciji signalizacije za pješake na navedenom pješačkom prelazu.

3. Pokrećem inicijativu prema MUP-u KS, VII Policijska uprava, PS Ilijaš, da se na pješačkom prelazu Alića rampa, zbog neispravne svjetlosne signalizacije, za pješake u terminima dolaska i odlaska u školu učenika, pošalje policijski službenik koji bi u navedenim terminima regulisao prelazak učenika na ovom pješačkom prelazu.
4. Pokrećem inicijativu prema nadležnoj općinskoj službi da se izađe na teren kod reciklažnog dvorišta na desnoj strani kolovoza u pravcu mosta prema Kadarićima i da se pokuša iznaći rješenje da se izgradi pjašačka staza-trotoar koji već postoji i da spoji sa mostom u dužini cca 100 m.

Obrazloženje: Izgradnjom ovog trotoara poboljšala bi se sigurnost pješaka koji ovom dionicom svakodnevno prolaze.

ALMIR ŠPIODIĆ – samostalni vijećnik

Već sam ranije govorio da se na postavljena pitanja i pokrenute inicijative ne dobijaju konkretni odgovori, odnosno dobijaju se izgovori i tako se to odugovlači.

Pitanja:

1. U kojoj fazi je priprema Idejnog projekta za izgradnju podhodnika ispod željezničke pruge za pješake u Podlugovima?

U materijalima za 33. sjednicu OV-a Ilijaš, dobio sam odgovor na inicijativu koju sam pokretao na 30., 31. i 32. sjednici OV-a Ilijaš.

U tom odgovoru stoji: "Inicijativa se prihvata i pokreće se procedura shodno planskoj dokumentaciji. U ovoj godini će se uraditi Idejni projekat, prema RP "Podlugovi" je dala lokacija za podhodnik koji gravitira školi. Obzirom da su pojedinačno potrebna velika finansijska sredstva, kad se završi Idejni projekat ići će se u postupak rekonstrukcije finansiranja tog projekta i tada će se ova inicijativa uputiti na relevantne adrese koje su date u ovoj inicijativi".

S obzirom da je kraj godine i ostaje nam još samo jedna sjednica OV-a Ilijaš, očekujem da nam do naredne sjednice dostavite Idejni projekat na uvid ili da ga objavite na web stranici općine Ilijaš.

Važnost ovog projekta prepoznali su i zastupnici u Skupštini Kantona Sarajevo, te na jednoj od održanih sjednica inicijativom tražili da se u Budžet Kantona Sarajevo za 2020. godinu uvrsti finansiranje istog.

Uzimajući u obzir da je aktuelna Vlada Kantona Sarajevo u ovoj godini podržala dosta projekata na općini Ilijaš, nadam se da će prihvatiti i ovaj vrlo važan za građane Podlugova, Lješeva i Ljubnića.

I zbog tog razloga općina Ilijaš treba imati spremnu plansku dokumentaciju i Idejni projekat.

2. Na pokrenutu inicijativu sa prošle sjednice vezano za naselje Sovrle i izgradnju apartmanskih naselja gdje su građani tražili da im se asfaltira 250 m puta kako bi se spriječila prašina i problemi koje im stvaraju kamion, mašine i bageri koji prolaze do

tih apartmanskih naselja dobio sam odgovor da urbanističko građevinski inspektor i predstavnik Službe za saobraćaj i stambeno-komunalne poslove izaći na lice mjesta, utvrditi činjenično stanje i nakon toga poduzeti odgovarajuće mjere i aktivnosti.

Pitanje glasi koje su to odgovarajuće mjere i aktivnosti koje će te poduzeti?

Inicijativa:

Pokrećem inicijativu ispred grupe građana sela Sudići – MZ Dragoradi prema JP Sarajevo-šume (Šumska uprava Srednje) da izvrši prokres i uklanjanje stabala koja su u putnom pojasu koji vodi kroz selo Sudići kako bi se mogla uspostaviti redovna autobuska linija putem koji prolazi kroz selo i spaja se na put koji vodi do Dragorada. Do sada je bilo praksa da autobus zaobilazi Sudiće putem koji vodi do Dragorada što predstavlja problem ljudima, a pogotovo djeci koja najviše koriste prevoz do škole. Djeca moraju da pješače kroz šumu 2 km do autobusa. Građani su se pismeno obraćali Centrotrans-u, te dobili odgovor od menadžmenta da će uspostaviti tu liniju samo da se izvrši raskres puta i uklone stabla koja bi smetala prolasku autobusa.

MUHAMED HANDŽIĆ – samostalni vijećnik

Pitanje:

Pitanje se odnosi na inicijativu iz mjeseca marta i naš Zaključak iz mjeseca marta.

Zaključkom smo tražili od Ministarstva komunalne privrede i infrastrukture Kantona Sarajevo da u što skorije vrijeme, otvori Centar za pružanje komunalnih usluga građanima općine Ilijaš, koji bi bio od velikog značaja, obzirom da bi omogućavao plaćanje komunalnih usluga javnih preduzeća: KJKP "Vodovod i kanalizacija" d.o.o. Sarajevo, KJKP "Toplane" d.o.o. Sarajevo, KJKP "Rad" d.o.o. Sarajevo i KJKP "Sarajevogas" d.o.o. Sarajevo na jednom mjestu.

Već sam navodio da su ti Centri otvoreni gotovo u svim općinama Kantona Sarajevo. Mi naše građane na ovaj način kažnjavamo već dugo i oni plaćaju značajna finansijska sredstva za poštarine prilikom plaćanja svojih računa. U tom smislu, naša inicijativa je otišla prema ministru Mandiću koji nam je dao odgovor da to nije planirano u Budžetu za tekuću godinu, ali će nastojati da sredstva budu planirana u okviru rebalansa Budžeta za tekuću godinu. Međutim, vidimo da to nije pokrenuto s "mrtve tačke" i obzirom da se već radi o Budžetu za narednu godinu, ja postavljam našoj nadležnoj općinskoj Službi i načelniku i tražim da mi se usmeno odgovori da ljudi znaju šta smo mi poduzeli po tom pitanju, koje smo pripreme izvršili za otvaranje Centra za pružanje komunalnih usluga građanima općine Ilijaš i jesmo li u svojim zahtjevima, osim ovog Zaključka, tražili od Ministarstva za komunalnu privredu Kantona Sarajevo da u narednoj godini planira sredstva za ove svrhe.

SEMIR DEDIĆ – vijećnik SDA

Pitanje:

Postavljam pitanje prema Željeznicama Federacije BiH u vezi pružnog prelaza u Malešićima (prvi prijelaz iz pravca Ilijaša), a pitanje glasi: Da li Željeznice Federacije BiH planiraju i kada postaviti ozbiljnu signalizaciju sa rampom na navedenom pružnom prelazu? Obzirom da svakodnevno saobraća veliki broj vozila ovom trasom, pitanje je dana kada će doći do nesreće sa katastrofalnim posljedicama.

Inicijativa:

Pokrećem inicijativu prema nadležnoj općinskoj službi da izađe na teren i utvrdi činjenično stanje, te predloži šta se može uraditi u vezi sanacije dijela potoka iznad kuće Hilal Kasima u Misoči. Nakon poplava uzrokovanih vremenskim neprilikama od prošle godine, širina potoka je porasla za 3-4 puta, te voda kreira mogućnost stvaranja klizišta jedne strane potoka. Ovo se može riješiti sa nekih 5-10 cijevi Q 100 ili Q 80. Realno ne predstavlja veliki trošak niti ulaganje, a riješit ćemo dugoročni problem.

ALEN HASKOVIĆ – vijećnik SDA

Inicijativa:

Pokrećem inicijativu da Služba za geodetske poslove izađe na teren u Stari Ilijaš kod firme Standard i oslobodi pješački put k.č.br.1369/1 koji je uzurpiran od strane vlasnika parcele k.č.br.1375/2 K.O. Ilijaš Grad, što trenutno onemogućava korištenje istog od strane lokalnog stanovništva. Napominjem, pomenuti pješački prolaz je ucrtan i u Regulacioni plan Stari Ilijaš.

ELDAR ŠEHIĆ – vijećnik SDP-a

Postavljam pitanje za općinske službe. Ima li smisla da mi više postavljamo pitanja i pokrećemo inicijative za pružni prijelaz Alića rampa?

Inicijativa:

Pokrećem inicijativu prema nadležnim općinskim službama, ako je moguće, da nas na slijedećoj sjednici OV-a informišu o tome koliko je u posljednoj godini bilo pitanja i inicijativa vezano za pružni prijelaz Alića rampa.

MUHAMED HANDŽIĆ – samostalni vijećnik

Primjećujem da sve kolege koje su diskutovale, izuzev mene, diskutovali su posebno za saobraćajnu infrastrukturu na području općine Ilijaš. Dakle, očito je da ovdje nešto nije uredu. U tom smislu treba pokrenuti inicijativu ili da održimo tematsku sjednicu, pozovemo ministra saobraćaja Kantona Sarajevo i direktora Direkcije za ceste da dođu na tu tematsku sjednicu, da im iznesemo sve probleme koje smo akumulirali i kojih dosta ima, počev od pitanja kolege Mirze Bektića i mislim da bi 1000 policajaca na općini Ilijaš bilo malo da pokrije sve raskrsnice kada djeca ujutro polaze u školu. Mislim da je i do roditelja puno, jer mi hoćemo da nam neko dijete "donese" u školu.

Moramo tražiti rješenja i možda organizovati tematsku sjednicu po pitanju i saobraćaja i putne infrastrukture, a na kraju krajeva sugerisati roditeljima da obezbjede dolazak u školu svom djetetu kao i odlazak iz škole.

MEHMED SINANOVIĆ – vijećnik SDA

Inicijativa:

Pokrećem inicijativu prema Direkciji za puteve Kantona Sarajevo da izvrši sanaciju pješačke staze i postavljanje saobraćajnog znaka (zabrana parkiranja i zaustavljanja motornih vozila) na regionalnom putu R445 ulica Moševačka, ispred objekta "Liščevica" promet.

Obrazloženje: Na definisanoj lokaciji regionalnog puta otežano je kretanje pješaka zbog

parkiranih motornih vozila gdje su pješaci prinuđeni zaobilaziti i izlaziti na regionalnu cestu R445 čime ugrožavaju svoju sigurnost.

ANEL BUMBULOVIĆ – vijećnik SDA

Inicijativa:

Pokrećem inicijativu prema nadležnim općinskim službama da se organizuje radni sastanak sa predstavnicima JU Zavod zaštitu žena i materinstva Kantona Sarajevo i predstavnicima Zavoda za javno zdravstvo Kantona Sarajevo. Na navedenom sastanku bi pored načelnika općine Ilijaš trebali biti i predstavnici Općinskog vijeća.

Obrazloženje: Na jednoj od predhodnih sjednica sam uputio inicijative prema navedenim ustanovama, ali moram priznati da nisam u potpunosti zadovoljan sa dobijenim odgovorom s tim da od Zavoda za javno zdravstvo nisam ni dobio odgovor.

Stoga sam predložio ovaj sastanak kako bi se pokušali riješiti pojedini problemi pacijenata i u velikoj mjeri olakšalo korištenje zdravstvenih usluga u navedenim ustanovama.

AKIF FAZLIĆ – općinski načelnik

Obzirom da je vijećnik Muhamed Handžić tražio direktan odgovor vezano za uspostavljanje Centra za pružanje komunalnih usluga građanima općine Ilijaš ja mogu kazati slijedeće: općina Ilijaš ima obezbjeđen kancelarijski prostor za uspostavljanje Centra. Prva naša varijante jeste namjenska kancelarija u okviru Javne tržnice, a ako ona ne bude zadovoljavala možemo tražiti druge alternative. Ja sam usmeno u nekoliko navrata ovu temu sa ministrom za komunalnu privredu Kantona Sarajevo otvarao. Nažalost, ona se nije našla u realizaciji u ovoj godini i ne znam hoće li se naći u realizaciji za iduću godinu. Nacrt Budžeta Kantona Sarajevo je objavljen i vi ste tu vidjeli u Ministarstvu za komunalnu privredu nema direktno općina, nego imamo jednu zajedničku stavku i vjerovatno će ministarstvo tu zajedničku stavku pokušati, ja se nadam, dijeliti kroz neke vrste javnog poziva gdje ćemo mi sa projektima aplicirati. Također šta možemo uraditi i mislim da je to dobro i da je na tragu inicijative Muhameda, a to je da kroz Javnu raspravu o Budžetu Kantona Sarajevo uputimo tu inicijativu da se nađe direktno u Budžetu Kantona Sarajevo za 2020. godinu i osim toga što se obezbjeđuju sredstva ovdje je jako bitan i interes kantonalnih komunalnih preduzeća. Nažalost, oni ne iskazuju neki značajniji interes zbog toga što svako pojedinačno preduzeće mora imati svog uposlenika. Zakon im još uvijek ne dozvoljava da jedan čovjek vodi sve evidencije za sva ta komunalna preduzeća, npr. JKP "Rad", Toplane, Sarajevogas koje pružaju usluge u općini Ilijaš da jedan čovjek vodi tri blagajne. Sada to ne mogu. Znači, potrebna su tri čovjeka, jedna vrsta organizacije i to ćemo s njima raditi, ali mislim da bi to promijenilo stav Ministarstva komunalne privrede da kaže otvara se Centar i to bi sigurno sve njih natjeralo.

Druga tema koju puno pominjemo, a to je problematika za saobraćaj koji tangiraju Željeznice Federacije BiH. Mislim da ste dobili Zapisnik sa sastanka kojeg je imala široka delegacija Općinskog vijeća, mene, predstavnika Službe gdje smo sve ove teme načeli od Podlugova, uređenje prostora, Alića rampe, Malešića, gdje se izdefinisala ta problematika i nažalost mi smo izašli vrlo razočarani sa tog sastanka. Ono što želim da kažem jeste da mi nekako tu vrstu krivnje za tu situaciju nemojmo sami sebi da stavljamo. Mi radimo šta možemo uraditi. Nama je jasno na sastanku kazano da rampa u Melešićima neće još dugo funkcionisati zbog problema nabavke opreme koja treba da bude kompatibilna sa opremom koja je nekada davno instalirana, ali da Željeznice vode računa o sigurnosti saobraćaja i da se vozovi zaustavljaju i da je to odgovor Željeznica.

Ovo što je još Muhamed govorio, to je suština i moramo biti na tragu te priče. Dakle, mi smo imali Alića rampu onakvu prije nego što je sada, vrlo tešku, vrlo zahtjevnu, vrlo neuslovnu. Dobili smo sada jedan prijelaz koji eto nama smeta što možda po 2-3 minuta čekamo, a zaboravljamo temeljni zahtjev zbog čega je to sve pokrenuto, a to je sigurnost. Sigurnost je ključ broj jedan i ono ima svoje posljedice. Posljedice su da nastane red vozila, da izgubimo svi po nekoliko minuta, ali ljudi to moramo prihvatiti kao rješenje. Nema drugog rješenja, odnosno drugo je rješenje koje ćemo mi pokrenuti kroz Izmjene i dopune Regulacionog plana Banovac koji je trebao da bude na ovoj sjednici Općinskog vijeća, ali nismo još dobili saglasnost na saobraćajno rješenje, a na urbanizam smo dobili od strane Željeznica i Direkcije za ceste da radimo podhodnik koji bi se radio na ulazu u Željezaru i prema autobuskoj stanici Centrotransa kao ključno, moderno i efektno rješenje za ovaj grad. Dogle moraju funkcionisati ovi prelazi da zadovoljavaju, prije svega, sigurnost, a onda drugo, neki komfor i komoditet. Znači, da malo realnije prilazimo tome uz želje da je to perfekcija. Nažalost, nije perfekcija, znamo kakvo je stanje u Željeznicama i s aspekta finansije i tehničkih dostignuća i rješenja, ali zajedno se moramo boriti da to bude što primjerenije i što bolje.

ALMIR ŠPIODIĆ – samostalni vijećnik

Želim reći da nismo dobili Zapisnik sa tog sastanka i da medijski to nigdje nije bilo propraćeno.

MUHAMED HANDŽIĆ – samostalni vijećnik

Zahvaljujem se načelniku na odgovoru koji je omogućio i građanima općine Ilijaš da čuju u kojoj fazi je ovaj projekat vezano za Centar za plaćanje komunalnih usluga. Međutim, mi na ovome ne smijemo stati. Dajte da nešto uradimo po ovom pitanju. Načelnik je već rekao na koji način to ide prema Budžetu Kantona Sarajevo. Ako to ne bude išlo mi ćemo pozvati građane na građansku neposlušnost. Moram reći, kao odgovorni građanin i vijećnik, da ne plaćaju komunalne usluge dok nam se ne obezbjede uslovi kao što su obezbjeđeni i u Vogošći, Centru, Starom Gradu, Novom Sarajevu, Novom Gradu, Ilidži i Hadžićima.

ALMA OMEROVIĆ – predsjedavajuća

Načelniče, želim reći da nije dostavljen Zapisnik sa ovog sastanka i oni iz Željeznica su imali obavezu da nama dostave taj Zapisnik. Ukoliko možete, vi insistirajte da nam dostave Zapisnik kako bi kolege vijećnici mogli vidjeti da smo iznijeli sva pitanja i inicijative koja su postavljena u ovoj sali prema predstavnicima Željeznica Federacije BiH.

AKIF FAZLIĆ – općinski načelnik

Bili ste svjedoci na tom sastanku, Željeznice maltene nisu ni vodili Zapisnik. Vodio je to pomoćnik Službe za saobraćaj i stambeno-komunalne poslove, napravljena je jedna vrsta Zapisnika i vidjet ćemo je li usuglašen i za narednu sjednicu Općinskog vijeća tu vrstu materijala ćemo vam dostaviti.

AD-2

Izveštaj o realizaciji zaključaka sa 35. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 35. sjednice

AD-3

Informacija o izvršenju Budžeta općine Ilijaš za period 01.01.30.09.2019. godine

MERIMA OSMANOVIĆ – pomoćnica načelnika

U izvještajnom periodu 01.01.-30.09.2019. godine Budžet općine Ilijaš je ostvario 12.295.705,00 KM prihoda, što predstavlja 69% od planiranih prihoda u Budžetu za 2019. godinu.

Sa druge strane, ostvareni su izdaci u iznosu od 9.694.783,00 KM, što predstavlja 55% od planiranih izdataka u Budžetu za 2019. godinu. Prema tome ostvaren je suficit u navedenom periodu u iznosu od 2.600.922,00 KM. Obzirom da je u toku realizacija planiranih projekata čija se implementacija očekuje do kraja godine time će i izvršenje, odnosno rashodovna strana dostići nivo planiranih sredstava u Budžetu za 2019. godinu.

Porezni prihodi u izvještajnom periodu u odnosu na planiranu veličinu na godišnjem nivou su ostvareni u iznosu od 4.177.480 KM odnosno 73%. U ukupnoj strukturi ovih prihoda najveći prihodi su ostvareni po osnovu poreza na imovinu kao i porez na promet nepokretnosti i prava i prihodi od indirektnog oporezivanja koji pripadaju jedinicama lokalne samouprave.

Kada se tiče neporeznih prihoda, ostvareni su u procentu od 67% u odnosu na plan ili 1.968.982,00 KM. U ukupnoj strukturi ovih prihoda najveći prihodi su ostvareni po osnovu naknada za izgradnju i uređenje građevinskog zemljišta, po osnovu komunalne takse, administrativne takse, te ostalih prihoda od imovine.

Ostvarenje prihoda je na nivou u odnosu na planirane veličine i kad su u pitanju prihodi po osnovu tekućeg granta za posebne namjene od Kantona Sarajevo koji bilježe ostvarenje od 53%. U strukturi ovih prihoda, prihodi po osnovu redovnih tekućih transfera Kantona je ostvaren u iznosu od 368.912,00 KM. U strukturi ovih namjenskih prihoda evidentirani su prihodi i to: prihodi od Ministarstva za boračka pitanja za boračku populaciju po osnovu Zakona o dopunskim pravima boraca u iznosu od 243.801,00 KM, prihodi od Ministarstva obrazovanja Kantona Sarajevo u iznosu od: 125.111,00 KM, a odnose se na subvencioniranje prevoza učenika osnovnih i srednjih škola.

Prihodi od donacija ostvareni su u iznosu od 5.950,00 KM što u odnosu na plan iznosi 73%, a prihodi se odnose na putnu infrastrukturu i predstavljaju učešće građana MZ Mrakovo i Podlugovi.

Kapitalni transferi od ostalih nivoa vlasti ostvareni su u iznosu od 118.505,00 KM što u odnosu na plan predstavlja 36%.

Kapitalni transferi od Federacije u iznosu od 30.000,00 KM. Federalno ministarstvo raseljenih osoba i izbjeglica. Za sufinansiranje projekta puta Sovrle – Marići. Kapitalni transferi od KS su ostvareni u iznosu od 886.530,00 KM gdje izdvajamo transfer Ministarstva obrazovanja za sufinansiranje projekta nabavke opreme za novoizgrađenu salu za Tjelesni odgoj u JU "SŠC" Nedžad Ibrišimović "Ministarstva privrede za sanaciju

saobraćajnica put za Korita u iznosu od 69.012,00 KM i Sanacija i asfaltiranje puta Spahin Han – Gajevi u iznosu od 82.518,00 KM, Rekonstrukcija kamionskih puteva u obuhvatu šuma i šumskih zemljišta put Gornja Misoča – Zenik 250.000,00 KM i sredstva Ministarstva prostornog uređenja za izgradnju reciklažnog dvorišta u iznosu od 250.000,00 KM i 60 0000 za revitalizaciju starog grada Dubrovnika.

Kapitalni transferi od nevladinih izvora 201.975,00 KM za izgradnju primarne vodovodne i kanalizacione mreže za naselja Sovrle I i Sovrle II.

Kapitalni primici od prodaje zemljišta ostvareni su u iznosu od 54% u odnosu na plan odnosno 621.730,00 KM.

Primici od domaćih zaduživanja ostvareni u iznosu od 1.200.000,00 KM po osnovu dugoročnog kredita za finansiranje izgradnje Gradskog stadiona sa pratećim objektima u općini Ilijaš.

Kada je u pitanju rashodovna strana, bruto plaće i naknade uposlenim izvršene su u iznosu od 1.428.281,00 KM što predstavlja 70% planiranih sredstava na godišnjem nivou. Sredstva za bruto plaće ostvarena su u procentu od 68 % od planiranih sredstava na godišnjem nivou. Doprinosi poslodavca ostvareni su na nivou planiranih sredstava na godišnjem nivou.

Izdaci za materijal i usluge izvršeni su u iznosu od 649.203,00 KM što je 55% planiranih sredstava na godišnjem nivou. Struktura ove grupe izdataka je analitički prikazana u "posebnom dijelu" Informacije, te je nećemo posebno obrazlagati.

Kada se tiče pozicije tekući transferi, evidentirani su izdaci u iznosu od 1.537.462,00 KM što procentualno iznosi 61% od planiranih izdataka ove vrste na godišnjem nivou, a u odnosu na isti period prošle godine su manji za 5%. U obrazloženju Informacije detaljno su obrazloženi izdaci za udruženja građana u izvještajnom periodu, i ovim putem ih nećemo pojedinačno iznositi.

Kapitalni transferi i izdaci su ostvareni u iznosu od 5.900.269,00 KM što je 50% od planiranog godišnjeg iznosa kroz koje su realizovani brojni projekti prikazani kroz analitiku, a koji su omogućili rješavanje brojnih problema građana i koji doprinose poboljšanju uslova i ugodnijeg življenja u općini Ilijaš.

Sredstva Budžetske rezerve u izvještajnom periodu iznose 39.663 KM i to za rješavanje stambenog zbrinjavanja, pomoći za liječenje kao i pomoći za sanaciju štete nastale na objektima za stanovanje kao i sredstva za projekte vezane za obilježavanje mjeseca Ramazana.

SEMIR DEDIĆ – vijećnik SDA

Da li postoje projekti koji nisu realizovani zbog procedura javnih nabavki? Ne pitam sada za nabavke računara, stolica za potrebe općine i to ide svojim tokom, nego za veće projekte kao što su investiciona ulaganja, sanacije itd.

MERIMA OSMANOVIĆ – pomoćnica načelnika

Za sve projekti koji su planirani u ovo Budžetu provedeni su postupci javnih nabavki i uglavnom su svi u fazi realizacije i očekujemo da će najveći broj biti i realizovan do kraja godine, izuzev projektovanja koja su u toku i predstavljaju pripremu za realizaciju Budžeta 2020. godine.

MUHAMED HANDŽIĆ – samostalni vijećnik

Imam pitanje koje se odnosi na korespondenciju između Općinskog vijeća i općinskih službi i načelnika. Ovaj dokument je u vidu Informacije i ovo nam je praksa u zadnje 2-3 godine da se daje Informacija Općinskom vijeću o izvršenju Budžeta kvartalno ili neki drugi period i nisam siguran da li smo prošle godine dobili Informaciju ili Izvještaj na godišnjem nivou. U Poslovniku OV-a u članu 99. da su akti koji se dostavljaju OV-u Izvještaji, a ne Informacija. Informacija je nešto drugo. Mi Informacije primamo k znanju, ne glasamo i ne donosimo nikakve odluke o toj Informaciji. Izvještaj je nešto sasvim drugo i Izvještaj je znatno "teži" dokument i odgovorniji za nas vijećnike. U tom smislu ja tražim od sekretara OV-a i od predsjedavajuće da mi odgovore da li je ispravno i da li je pravilno da se dostavlja Izvještaj, jer ja želim da radim ovdje kao odgovoran vijećnik, a ne da Poslovnik mijenja neko drugi kako mu padne na pamet. Ako je Informacija o izvršenju Budžeta, dajte da to ugradimo u Poslovnik, a ako je Izvještaj, onda da nam to dođe u formi Izvještaja. Merima je za govornicom rekla "u ovom izvještajnom periodu".

U ovoj Informaciji ima niz nejasnoća, ali ne želim da opterećujem Vijeće, pomoćnike načelnika i one za koje to nije, a sa svojim zabilješkama ću otići kod pomoćnice načelnika ili načelnika da mi se da objašnjenje za ovo.

AKIF FAZLIĆ – općinski načelnik

Po Zakonu o Budžetima, obaveza je da općinski načelnik izađe pred Općinsko vijeće sa dva izvještaja – polugodišnji i godišnji Izvještaj. Nekada davno smo ustanovili praksu, cijeneći to nedovoljno da ovo Vijeće bude nedovoljno informisano sa ta dva Izvještaja, da pravimo i kvartalne Informacije. Znači, mi pravimo dva Izvještaja koji imaju svoju formu i predaju se tamo gdje treba da se predaju i vi odlučujete o tim Izvještajima, glasate, podržavate ili ne. Uvođenje kvartalnih Informacija je više stvar informisanja Vijeća o stanju realizacije Budžeta. Sada, po meni, ako šta treba mijenjati, onda Poslovnik dopuniti kada je u pitanju informisanje vezano za realizaciju Budžeta, a ovdje ne možemo ništa drugačije uraditi obzirom da je Zakon o Budžetima jedna vrsta lex specialis Zakona i on je propisao ovu vrstu izvještavanja.

MUHAMED HANDŽIĆ – samostalni vijećnik (replika)

Zahvaljujem načelniku na objašnjenju. Sekretar OV-a će morati poraditi na ovim izmjenama u Poslovniku tako da mi možemo u potpunosti koristiti Poslovnik, a ne da postavljamo pitanja kao da sam prvi put ovdje, a ovdje sam evo devet godina.

Diskutanata po ovoj tački dnevnog reda više nije bilo, pa je OV-e primilo k znanju

Informacija o izvršenju Budžeta općine Ilijaš za period 01.01.30.09.2019. godine

AD-4

Nacrt Budžeta općine Ilijaš za 2020. godinu

AKIF FAZLIĆ – općinski načelnik

Kratko ću prezentirati ovaj Nacrt. U obrazloženju ste dobili detaljne informacije kako je on rađen, na osnovu čega je rađen i na osnovu čega se došlo do projekcija kakve jesu u ovim tabelama kada su u pitanju prihodi i rashodi za 2019. godinu. Ono što je osnovna

karakteristika ovog Budžeta u odnosu na Budžet za prethodne dvije ili tri godine je da je on značajno smanjen kada je u pitanju njegova visina, odnosno fiskalni kapacitet općine Ilijaš kojeg smo procijenili za iduću godinu u iznosu od 14.664.900,00 KM. Iz tabele prihoda možete vidjeti da su praktično dvije pozicije opredjelile ovo smanjenje. Prva pozicija jesu kreditna sredstva od 1.200.000,00 KM koja smo imali u Budžetu za ovu godinu i kojih više nema narednih godina, jer smo napravili ovo zaduženje i druga pozicija jesu prenesena sredstva i suficiti koje smo imali u prethodnih nekoliko godina. Dakle, i ona su smanjena za 1.882.000,00 KM što znači da je ukupno smanjenje na ove dvije pozicije praktično 3.082.000,00 KM, a Budžet za ovu godinu je manji za 3.069.000,00 KM. Kroz ove stavke se vidi da je realizacija iz prenesenih sredstava, realizacija kapitalnih projekata u ovoj godini bila značajna i ta realizacije je praktično doprinijela smanjenju ovih prenesenih sredstava.

Kada su u pitanju prihodi, važno je naznačiti nekoliko bitnih stavki. Konstantno imamo jedan nivo poreza na promet na imovinu, negdje 1.365.000,00 KM i značajno doprinosi finansiranju tekućih rashoda, tekućih izdataka, takođe prihod od indirektnih poreza povećani su za 8%. Dakle, imamo jedan rast i kada su u pitanju ovi prihodi od indirektnog oporezivanja vezano za auto-ceste i Direkciju za ceste, vi znate da je od uvedene akcize na gorivo i distribucija sredstava, jedan dio dolazi i do općina i mi iz tog prihoda imamo 639.000,00 KM i imamo generalno od PDV-a porast od 9% po projekciji koju smo dobili iz Federalnog ministarstva finansija. Važna stavka su i prihodi od davanja prava na eksploataciju prirodnih resurs ili kako mi to zovemo koncesije. Imali smo prihod od 200.000,00 KM kada smo dali prethodnu vodnu saglasnost na izgradnju dvije mini hidroelektrane na rijeci Bosni. Taj proces je doveden praktično do prijedloga Ugovora koji treba da se nađe na Skupštini Kantona Sarajevo u decembru što znači da će se ovaj koncesioni Ugovor zaključiti, a u njemu je definisano da jednokratna koncesiona naknada će iznositi cca. 540.000,00 KM i 60% pripada općinama što će biti prihod i mi smo ovdje stavili 300.000,00 KM, a možda nešto i više od 300.000,00 KM. Ta jednokratna koncesiona naknada uplaćuje se 15 dana po potpisivanju koncesionog Ugovora. Ostale stavke smo zadržali na nekom nivou koji je dostignut i pratimo ga i to je taj nivo sredstava. Naknade i takse 280.000,00 KM, imamo prihode od renti i uređenje gradskog građevinskog zemljišta 1.350.000,00 KM. Ovo je baš ambiciozna stavka, ali mislim da ćemo je u ovoj godini realizirati i da ćemo stvoriti pretpostavke da se realizira i u narednoj godini. Ostale pozicije su praktično na nivou pozicija koje smo imali u Budžetu za ovu godinu. Primljeni kapitalni transferi od Kantona Sarajevo su nešto niži ili gotovo na nivou kako je planirano i u 2019. godini. Vlada Kantona Sarajevo je kroz Nacrt Budžeta promijenila malo način finansiranja ili sufinansiranja kapitalnih projekata i oni neće vjerovatno ići kroz direktnu preraspodjelu prema općinama kroz kantonalni Budžet, nego će Vlada svojim Odlukama pojedine projekte odobravati sa zajedničke definisane pozicije tih kapitalnih projekata.

Ovakva struktura prihoda realno prikazuje po nama vrijednost od 14.664.000,00 KM i želim odmah kazati da nivo projekata koje mi imamo u ovim godinama očekujem da neće biti ni malo manji obzirom i na smanjenje ovog Budžeta, da ćemo obezbjediti realizaciju tih projekata ne samo kroz ovaj Budžet, nego i kroz Budžet Kantona Sarajevo i institucija koje realiziraju Budžet Kantona Sarajevo, a prije svega tu mislim na Direkciju za ceste. Za građane općine Ilijaš je bitno da se realiziraju projekti, a manje je bitno način implementacije i ko je implementator tih projekata.

Kada su u pitanju rashodi, vidjeli ste plate 2.138.000,00 KM ili za 4% više. U proračunu ove cifre za plate predviđeno osam novih uposlenika, pet sa srednjom i tri sa visokom stručnom spremom. Izdaci za materijal i usluge zadržani ili simbolično smanjeni za 27.000,00 KM u ukupnom iznosu. Tekući transferi i drugi nivoi vlasti 2.615.000,00 KM i tu

imamo povećanje od 83.000,00 KM. Ovdje ću nabrojati samo nekoliko bitnih stavki koje se možda dijelom mijenjaju u odnosu na Budžet za 2019. godinu. Za 2020. godinu imamo transfer za izbore 50.000,00 KM, odnosno 42.500,00 KM je povećana ta cifra. Zna da se Lokalni izbori finansiraju iz Budžeta, imamo JU "KSC i Radio Ilijaš" gdje smo predložili 342.000,00 KM, odnosno 14% više ili 42.000,00 KM zbog objektivnog pada vlastitih prihoda. U obrazloženju ste vidjeli zbog čega je taj pad vlastitih prihoda. Uveli smo stavku koju podržava i CRS vezano za osnaženje socijalno ugroženih porodica za 15.000,00 KM, stipendije zadržali 195.000,00 KM sa našim stavom da svi oni učenici i studenti koji ispune kriterije iz sve tri linije stipendiranja će dobiti stipendije, pa ako bude trebalo i rebalansirati ovu stavku; dječiji dodatak smanjen je za 37.000,00 KM i planiran je sa 70.000,00 KM, a to je zbog novih propisa koji su definisali taj imovinski cenzus; civilna zaštita ima nekoliko pozicija i vidjeli ste neka povećanja na tim pozicijama, ali prije svega, to je uravnoteženje prihodovne i rashodovne strane, jer imamo prihode po osnovu onih 0,5% na plate, tako da je taj Budžet i fondovski uravnotežen; prevoz učenika konstantno je 292.000,00 KM i toliko je tender pokazao i za narednu godinu; pogrebeni troškovi povećani su za 50.000,00 KM; ovi UNDP projekti, reducirani su zato što su neki završeni i što smo malo redizajnirali ono što će se raditi u narednim godinama; od Udruženja, većinu smo zadržali na nivou iz ove godine s tim što je povećanje za Udruženje "Budi mi drug" 4.800,00 KM i sada iznosi 22.800,00 KM; subvencije koje za poljoprivrednike izdvajamo godinama zadržano na nivou 270.000,00 KM s tim što smo uveli sada nove subvencije za mala i srednja preduzeća i obrte 50.000,00 KM za regresiranje kamata za mala i srednja preduzeća i obrtnike. Kada je u pitanju kapitalni Budžet, tu gdje su definisani projekti možemo vidjeti da ukupni kapitalni grantovi, odnosno kapitalni transferi i kapitalni izdaci iznose 8.455.000,00 KM i da ukupno u Budžetu učestvuju sa 57.7% opet značajno više od polovine Budžeta bez obzira na njegovo smanjenje. Sada neću detaljno obrazlagati ovaj dio pošto ste dobili u tabelama i bolje je da to sve kroz raspravu iskristališemo. Ono što želim naglasiti je da je ovim Budžetom od velikih projekata pozicionirana II faza Gradskog stadiona i želimo da u narednoj godini II fazu završimo, da je značajno naglašena pozicija izgradnje kanizacionih mreža, prije svega zbog toga što će u idućoj godini kroz Operativni plan Direkcije za ceste biti značajnih rekonstrukcija, regionalnih cesta i nekih drugih ulica koje su kandidirane i prihvaćene vezano za sam grad Ilijaš i kroz te rekonstrukcije želimo i da se izgradi ili sanira ili rekonstruiše kanizaciona mreža i da taj projekat u potpunosti bude doveden u funkciju sva saobraćajna i komunalna infrastruktura. To su ta dva ključna infrastrukturna projekta koji nose milionske iznose. Takođe značajno ulažemo u saobraćajnu infrastrukturu po svim mjesnim zajednicama. Kada je u pitanju segment obrazovanja, ono što je već u završnoj pripremi, a ona će se realizirati i završiti u 2020. godini, jeste pitanje sanacije stare fiskulturne sale u OŠ "Hašim Spahić" za produženi boravak. Taj projekat je vrijedan cca 270.000,00 KM, zatim konačna sanacija i rekonstrukcija prostora u JU Djeca Sarajeva Vrtić "Ilijaš", završit ćemo i novu fiskulturnu salu u SŠC "Nedžad Ibrišimović" i očekujem da otvaranje tog objekta bude za Dan općine Ilijaš.

Da dalje ne bih oduzimao vrijeme o svim drugim projektima, želim da čujem stavove, jer ovo je dokument kojim utvrđujemo prioritete. Javnu raspravu smo zakazali u terminu od 28.11.-15.12.2019. godine i svi bi trebali dati doprinos ovoj Javnoj raspravi i da pokušamo svi sa svoje strane unaprijediti ovaj Nacrt Budžeta s aspekta ako imamo neke prioriternije ili bolje projekte nego što su predloženi ovim Nacrtom, ali da znamo zaista neki njegov nivo fiskalnog kapaciteta da ga ne možemo ozbiljnije povećavati tako da neki novi projekti koji zavređuju da se nađu ovdje podrazumijevali bi da neke trebamo i isključiti. Kroz raspravu nastojat ćemo da to bude najbolje za građane općine Ilijaš i još jednom pozivam na ovu Javnu raspravu i da donesemo dokument sa kojim ćemo biti zadovoljni.

MUHAMED HANDŽIĆ – samostalni vijećnik

Ovo je krucijalni dokument općine Ilijaš i o njemu zaista treba ozbiljno razgovarati i što duže razgovarati, jer mi ovo, kako sam jednom rekao, za čas završimo, podignemo ruke i ode Budžet i onda čitavu godinu imamo pitanja i inicijative, a ne usklađujemo ih sa Budžetom. Kroz Javnu raspravu imamo vremena da damo svoja mišljenja i prijedloge i da o Prijedlogu Budžeta raspravljamo na nekoj slijedećoj sjednici. Nisam ni očekivao da Budžet bude veći i cca 17% je manji u odnosu na prošlu godinu. Međutim, kakva je situacija i politička i ekonomska kod nas, poredana hijerarhijski od nivoa države, federacije, kantona pa do općine, nije se nešto moglo više ni očekivati. Imam nekoliko pitanja i možda sada dobijem odgovor. Na jednoj od prethodnih sjednica postavio sam pitanje šta je sa projektom za mlade. U ovom Nacrtu Budžeta nisam vidio niti jednu aplikaciju koja će dati podršku mladima da ovdje nastave svoje školovanje, rad i da im na neki način pomognemo. Dao sam prijedlog koji je donekle bio ismijan od strane pomoćnice načelnika vezan za podršku mladima u smislu plaćanja kamatne stope za kupovinu stanova. To vjerovatno ne ide tako i možda ja to ne znam. Vidio sam stavku 50.000,00 KM za podsticaj malim i srednjim preduzećima i to treba, ali mislim da je moj prijedlog bio mnogo učinkovitiji za društvo i za općinu Ilijaš. Pod jednom stavkom su stručne usluge 100.000,00 KM u 2019. godini, a u 2020. godini 85.000,00 KM. Ne znam o kakvim se stručnim uslugama radi i dobro bi bilo da mi se na ovo pitanje odgovori. Ovo sam pitanje postavio iz razloga što sam na jednoj stavci vidio da kod uposlenika imamo savjetnika i stručnih saradnika dosta zaposlenih i možda ima nešto što nije u njihovoj oblasti, pa se to mora platiti 85.000,00 KM na godišnjem nivou. Kada je u pitanju Civilna zaštita, mislim da je ovo jedna od najneopremljenijih Civilnih zaštita u Kantonu Sarajevo kada su u pitanju općinski nivoi. Dakle, mi o tim ljudima definitivno moramo povesti računa. Juče smo osjetili zemljotres koji je bio mali kod nas i svi smo se uzburili. Moraju se njima obezbijediti sredstva, pomoćnik Zdravko bolje zna, možda se Služba treba i ljudstvom popuniti da djeluju onako kako treba i da budu u funkciji.

Zimsko održavanje puteva 385.000,00 KM, a za prošlu godinu je bilo 320.000,00 KM. Znači, povećanje je za 65.000,00 KM. Hoće li to značiti da će svi naši građani moći doći svojim kućama obzirom da imamo poljoprivrednih poduzetnika koji imaju stoku, a nisu mogli dovući hranu za stoku ako ne zovemo u općinu da im se odobri po potrebi mašina da očisti snijeg. Hoće li to značiti da će te putne komunikacije ući u redovno održavanje u zimskom periodu? Nisam vidio da se nešto povećalo za gorivo, a znam da nemaju više puno radnika, jer ljudi bježe od malih plata.

Za stadion 500.000,00 KM i dobro je da ćemo imati nešto čime ćemo se ponositi i to će na neki način biti spomenik načelniku ovdje u Ilijašu za njega živa.

Za JU KSC i Radio Ilijaš je povećana stavka i sa razlogom u obrazloženju što su izgubili ugovore sa osnovnom i srednjom školom i naravno da je to dobro za nas. I srednja i osnovna škola će imati svoje sportske dvorane, tako da neće morati koristiti ovu našu.

Za policiju i Centar za socijalni rad 15.000,00 KM, mislim da je malo i za jedne i za druge.

ALMIR ŠPIODIĆ – samostalni vijećnik

Kao što kolega Handžić kaže ovo je najvažniji dokument za jednu općinu i jednu jedinicu lokalne samouprave kojim se definišu tri stvari, odnosno konkretnije dvije. Jedno je prihodi, a drugo je rashodi. U izvršenju ili Izvještaju o izvršenju Budžeta, tačka koja je bila prije ove, vidjeli smo kako izgledaju porezni, neporezni prihodi itd. Ono što hoću da naglasim jeste da ovaj Budžet pripada građanima i oni ga u najvećoj mjeri pune iz svojih džepova tako da u ovu raspravu i odlučivanje o raspodjeli u Budžetu treba uključiti što više građana.

Činjenica da smo mi njihovi predstavnici ovdje koji možemo u ime njih da odlučujemo vezano za ta njihova sredstva, ja ću svakako kroz Javnu raspravu pokušati da organizujem bar 2-3 foruma građana u udaljenim mjesnim zajednicama gdje ću tražiti mišljenje i savjet od građana šta je to njihova najveća potreba i šta bi se to trebalo ugraditi u Budžet. Kolega Handžić kao i uvijek, objektivno, iznio je sve zamjerke koje sam i ja htio uputiti, a ima stavki koje su i meni nejasne. Vidim da su usluge medija povećane sa 25.000,00 KM na 32.000,00 KM. Možda ću biti grub ako kažem, nemojte da se ovim sredstvima finansiraju politički botovi na društvenim mrežama. Ako je to za medije i ako je to za naše ilijaške portale, onda je to uredu. Prošle godine sam inicirao da se poveća stavka za sport. Načelnik je to prihvatio, ali mislim da je još uvijek nedovoljna da se zadovolje sve potrebe koje imaju naši sportisti, sportska udruženja i klubovi. Koliko god mi izdvajali tih sredstava, moramo znati da se u današnje vrijeme sve plaća. Vrlo je važno da se naša djeca bave sportom, vrlo je važno da postoje škole fudbala, karate klubovi, taekwondo i mnoga druga udruženja koja na neki način pomažu u razvijanju naše djece kroz sport. U nekim zemljama je obaveza da djeca imaju vannastavne aktivnosti i da se bave nekim sportom. Ova sredstva su sigurno nedovoljna da se zadovolje sve potrebe naših sportskih klubova. U suštini mi nemamo neki sport koji se baš izdigao i da imamo takmičenje na nekom većem rangu. Svjedok sam da, u ovom dijelu koji me malo više interesuje, u fudbalu, da to nekako nazor funkcioniše, gdje su velike potrebe, gdje su veliki troškovi i svakako ću kroz Javnu raspravu predložiti da se ova stavka poveća na 250.000,00 KM. Mogu su neke stavke smanjiti, a ova povećati. Mislim da je neopravdano povećanje stavke za JU KSC i Radio Ilijaš. Menadžment ove ustanove bi trebao da poradi na uključivanju nekih projekata i vidimo da sve što su oni radili i aktivnosti koje su provodili su se dodatno finansirali iz Budžeta. Nemam ništa protiv ove Ustanove i nama trebaju mediji, ali neka se i oni malo više angažuju oko vlastitih prihoda. Načelnik je pomenuo stavku vezano za jačanje uloge mjesne zajednice u BiH. Ako općina Ilijaš i dalje ostane u tom projektu, mislim da su ovo nedovoljna sredstva i mislim da bi ova stavka trebala biti 35-36.000,00 KM kako bi ponovo imali učešća u projektu jačanje uloge mjesnih zajednica u BiH. Ono što me raduje u ovom Budžetu jeste da su planirana sredstva za nabavku za proširenje sportskog terena u Ljubnićima.

Iako je ovaj Budžet 14 miliona, iako je znatno manji u odnosu na 2019. godinu, mislim da je realan, ostvariv i načelnik to, kao i svake godine, vrlo vješto i ostvari i realizuje. Svakako je za pohvalu.

Sve ovo što sam već rekao nije to neka veća zamjerka, a ono ostalo što imam ću predložiti kroz Javnu raspravu.

Mislim da je ovakav Budžet realan i provodiv i stim u vezi ću ga ja podržati uz neke korekcije koje ćemo pokušati izmjeniti.

MIRSAD OSMANOVIĆ – vijećnik SDP-a

Neću govoriti o Nacrtu, ali evo jedna primjedba koju godinama iznosim. Ovo jeste bitan dokumenat, ali da bi se Javna rasprava kvalitetno provela, njega mora pratiti Program načelnika i službi. Masa stvari se određuje Program, što se ovdje ne vidi. Navest ću samo jedan primjer vršimo rekonstrukciju ulice i koga god od vijećnika pitaš, kaže izvršena rekonstrukcija, crni se asfalt, a ona nije urađena. Ostaje nam krak koji nije urađen. Građani ulice Ivana Franje Jukića su se malo ironično zahvalili načelniku na rekonstrukciju ulice uz riječi da i dalje idu blatom, blato ne dere cipele kao asfalt. Obzirom da je to najstarija ulica u Ilijašu molio bih da se uradi. Ovo je samo jedan primjer koji govori da je potreban Program.

ALEN HASKOVIĆ – zamjenik predsjedavajućeg

Iako je Nacrt Budžeta manji u odnosu na prošlu godinu iz objektivnih razloga, mislim da je on realan i kroz izlaganje načelnika vidjeli smo da sadrži dosta projekata od kojih će imati koristi svi naši građani. Mjesta za korekciju ima kroz Javnu raspravu i prilika je da pozovemo sve građane da se na adekvatan način uključe u Javnu raspravu i možda je najbolje da to učine preko aktuelnih Savjeta mjesnih zajednica i da tu potraže prostor za realizaciju manjih projekata. Također vidimo da su kapitalni transferi i u ovom Nacrtu Budžeta jako visoko zastupljeni što je za svaku pohvalu i mislim da je Budžet realan i da će ga biti moguće realizovati.

ALMA OMEROVIĆ – predsjedavajuća

Uputila bih dva amandmana. Naime, na prošloj sjednici Vijeća sam pokrenula inicijativu, a koju bih sada pretvorila u amandman vezano za poziciju Budžeta općine Ilijaš koja će biti planirana za isplatu simbolične novčane naknade porodicama koje dobiju blizance, treće ili više djece. Ovakav vid podrške izuzetno bi značio porodicama koje se odluče za više djece, a cilj svega ovoga je podrška natalitetu i osnaživanju porodice. Zamolit ću da se pripremi u formi amandmana.

Načelnice imam još jedan amandman.

AKIF FAZLIĆ – općinski načelnik

Predlažem da to budu prijedlozi za Javnu raspravu, a mi ćemo kao predlagači obraditi i iznijeti svoj stav po tome, kao i za svaki drugi prijedlog koji je danas ovdje iznesen.

ALMA OMEROVIĆ – predsjedavajuća

Drugi prijedlog na Nacrt Budžeta je da nadležna služba organizuje svečani prijem prvačića, jer se u mnogobrojnim općinama ne samo u Kantonu Sarajevo, nego i van Kantona, organizuje prijem prvačića. To bi bilo u smislu da nadležna služba organizuje prijem za sve prvačiće sa područja općine Ilijaš npr. na Trgu Alija Izetbegović, sportskoj dvorani ili već drugoj lokaciji. Znači, općina bi Budžetskom stavkom obezbjedila ruksake i školski pribor.

AKIF FAZLIĆ – općinski načelnik

Obzirom da je bilo pitanja, a i većina diskusija se odnosila na neku vrstu rasprave, a dva konkretno prijedloga kako sam ih ja razumio došli su od strane predsjedavajuće i sve ovo što danas pričamo je sastavni dio Javne rasprave i sve će biti predmetom stavova predlagača vezano za utvrđivanje Prijedloga Budžeta.

Kratko ću preći ovo što je vijećnik Handžić govorio vezano za stručne usluge – imate tamo u analitici šta sve pod stručne usluge spada. Znae da plaćemo usluge izrade završnih računa za sve mjesne zajednice i niz drugih sličnih usluga koje su vezane za računovodstvene i revizijske usluge; izdaci za hardverske i softverske usluge su postali praksa i bez tih usluga se danas ne može raditi i mi imamo nekoliko "kuća" sa kojima radimo stalno; stručne usluge za uspostavu digitalizacije u oblasti katastra – svjedokom smo stalnog rada u oblasti katastra, prošli smo i kroz program vezano za digitalizaciju arhiva za završetak digitalizacije katastra i ono što se u idućoj godini čeka jeste početak izlaganja za ovo sve što smo radili. Kada je u pitanju Civilna zaštita, potpuno isti stav

imamo Muhamede. Naša Civilna zaštita nije adekvatno ni blizu opremljena, pozicionirali smo je na nekoliko pozicija i juče sam potpisao pokretanje procedure za nabavku radio veze i opreme za opremanje Centra u Civilnoj zaštiti. Dakle, moramo kernuti i s tim projektima.

Zimsko održavanje povećano – proširen je obim usluga, ali neće još uvijek doći do kraja svake kuće. Dijelom se smanjuju trase po potrebi, proširuje se Progroma, pogotovo kroz asfaltiranje novih dionica, proširenje puteva. Takođe znamo da se ova stavka nešto niže realizuje, ali kako je kroz tendersku proceduru prošlo, mi smo ovdje pozicinili. Ove godine, mogu vas informisati, da su kroz tender prošle tri firme: firma Halilović za gornji kraj općine, firma Citar-produkt i uspjeh je da smo izborili da onaj ko čisti cestu da i trotoare čisti i firma Bosman. Ovdje smo podijelili područje na donjem kraju dva Lota, gornji kraj i trotoari. Kada je u pitanju stadion ja sam vas informisao. Znamo da smo ušli u jedan veliki projekat i njegovu realizaciju nekom idealnom smislu smo podijelili na tri godine. Sa ovom godinom završavamo I fazu cca 1.700.000,00 KM i ona će se ovih dana završiti, II faza – građevinsko zatvaranje objekta trebala bi se realizirati u 2020. godini i pozicionirana su sredstva za II fazu i onda u 2021. godini ostaje unutrašnje opremanje koje takođe može ići postepeno da se oprema prostor po prostor za sportske ekipe.

Ovo je projekat budućnosti.

JU KSC i Radio Ilijaš – ovo je jedan objektivan stav i ova općina je mislim jedina općina koja nema deficita u javnom sektoru i mi trebamo da vodimo tu politiku da nemamo deficita iz javne sfere. Mi smo osnivači ove Javne ustanove, mi kreiramo njenu politiku, a o njihovom radu pričat ćemo kada dođe njihov Izvještaj, ali moramo objektivizirati i njihovu finansijsku poziciju s aspekta prihoda isto kao što objektiviziramo i svoju finansijsku poziciju s aspekta našeg Budžeta. Znači, treba da ga realno ocijenimo i mi smo ga tako i pozicionirali.

Kada je u pitanju policija i Centar za socijalni rad vjerovatno bi trebalo više novaca, ali moj je stav, oni imaju svoja nadležna ministarstva koja treba da se brinu o njima i pogotovo me ovo razočaralo vezano za Centar za socijalni rad gdje ljudi nemaju maltene informatičke opreme uopšte. Kod mene je bio direktor Centra za socijalni rad gdje su oni iskazali neke potrebe cca 20.000,00 KM i ja sam rekao da ću predložiti da kroz naš Budžet prođe 10.000,00 KM da se nabavi bar dio te opreme.

Ovo što je govorio vijećnik Špiodić vezano za UNDP i MZ-e. Dakle, mi smo potpisali akte i zna se stav ove općine prema UNDP-u da podržavamo produženje tih projekata i ako dođe od strane donatora UNDP-a, prije svega Švedske i Švicarske Vlade ili ko već je njihov donator, mi ćemo to artikulirati kroz preraspodjelu u Budžetu i ti projekti će biti podržani.

Pitanje medija – mi imamo godišnje ugovore sa TV Vogošća i sa TV SA i ne bi želio da polemiziram kako se mediji upotrebljavaju. Možemo vidjeti neke reklame na televizijama i ja nisam pobornik toga i mislim da imamo jedan korektan i pristup, odnos i Ugovor vezano za medije.

Sport – po meni, ovo je naše dostignuće koje je zadovoljavajuće. Da li se ta sredstva mogu na bolji i efikasniji način upotrijebiti unutar onih koji ih koriste, ja mislim da mogu. Da li ti koji ih koriste mogu naći i dodatna sredstva, mislim da mogu. Dakle, ova mjera koja je uspostavljena omogućava našim sportskim klubovima da mogu adekvatno raditi.

Ovo što je Mirsad govorio, a nije rekao javno za govornicu, vezano za rebalans. Dakle, nije ovo sada manji Budžet da bi se on rebalansirao, ali ovo je Nacrt Budžeta koji smo mi realno postavili u odnosu na Nacrt Budžeta Kantona Sarajevo. Očekujem da ćemo kroz Budžet Kantona Sarajevo dobiti i više sredstava i da ćemo doći u poziciju da rebalansiramo naš Budžet, ali trenutno kako je sada koncipiran Nacrt Budžeta Kantona Sarajevo nije dao za osnov nama kao predlagačima da sad to stavimo, ali vidjet ćemo

kako će se stvari razvijati. Mi imamo pripremljene projekte pogotovo u sferi komunalne infrastrukture i sferi saobraćajne infrastrukture i bićemo najozbiljniji aplikatori prema sredstvima Budžeta Kantona Sarajevo. Opet ponavljam, nije bitno ko će ih implementirati, bitno je da tu implementaciju dobiju građani općine Ilijaš.

Ne znam šta ovo znači Mirsade vezano za blato u ulici Ivana Franje Jukića. Da li je to što su ovi nastavili ovaj krug, pa nanose blato, ne znam. Ta realizacija je podrazumijevala da se izmjeni asfalt i da se popravi pješačka staza. Projekat vodi Direkcija za ceste. Ona je obezbjedila 200.000,00 KM, a razlika koja će biti po završnom obračunu izvedenih radova obezbjedi će općina. Nadzor vrši Zavod za izgradnju Kantona Sarajevo i to je ono što ja znam o tom projektu i što očekujem od tog projekta.

MIRSAD OSMANOVIĆ – vijećnik SDP-a (replika)

Načelniče, kada si pravio prošli Program, molio sam te da sa pomoćnicima uzmeš čizme i uvjeriš se, a ovao je ulica odavde 50 m. Nije asfaltirana. To je ulica gdje su barake.

AKIF FAZLIĆ – općinski načelnik

Nismo se onda razumjeli. Nije to bilo predmet ovog Ugovora i kako je koncipiran ovaj projekat, ali ćemo ovo zapisati da vidim kakva je situacija.

Diskutanata po ovoj tački dnevnog reda više nije bilo, pa je OV-e jednoglasno donijelo

ZAKLJUČAK

Član 1.

Prihvata se Nacrt Budžeta općine Ilijaš za 2020. godinu i stavlja na javnu raspravu.

Član 2.

Nacrt Budžeta općine Ilijaš za 2020. godinu stavlja se na javnu raspravu, kako slijedi:

- objavom putem web strane općine Ilijaš
- objavom na oglasnoj ploči općine Ilijaš
- javnom prezentacijom u sali Općinskog vijeća .

U javnoj raspravi učestvovat će: građani, javna preduzeća, javne ustanove, mjesne zajednice, budžetski korisnici, političke stranke i ostale asocijacije i udruženja građana.

Član 3.

Javna rasprava o Nacrtu Budžeta općine Ilijaš za 2020. godinu se određuje u trajanju od 18 dana, počev od 28.11.2019. godin 15.12.2019. godine.

Član 4.

Nakon provedene javne rasprave primjedbe i prijedloge će se dostaviti Službi za privredu i finansije u pisanoj formi ili putem e-maila, najkasnije do 17.12.2019. godine – 12,00 sati.

Član 5.

Ovaj Zaključak stupa na snagu danom donošenja.

AD-5

Nacrt Odluke o izvršavanju Budžeta općine Ilijaš za 2020. godinu

Diskutanata po ovoj tački dnevnog reda nije bilo, pa je OV-e jednoglasno donijelo

ZAKLJUČAK

Član 1.

Prihvata se Nacrt Odluke općine Ilijaš za 2020. godinu i stavlja na javnu raspravu.

Član 2.

Nacrt Odluke općine Ilijaš za 2020. godinu stavlja se na javnu raspravu, kako slijedi:

- objavom putem web strane općine Ilijaš
- objavom na oglasnoj ploči općine Ilijaš
- javnom prezentacijom u sali Općinskog vijeća .

U javnoj raspravi učestvovat će: građani, javna preduzeća, javne ustanove, mjesne zajednice, budžetski korisnici, političke stranke i ostale asocijacije i udruženja građana.

Član 3.

Javna rasprava o Nacrtu Odluke općine Ilijaš za 2020. godinu se određuje u trajanju od 18 dana, počev od 28.11.2019. godin 15.12.2019. godine.

Član 4.

Nakon provedene javne rasprave primjedbe i prijedloge će se dostaviti Službi za privredu i finansije u pisanoj formi ili putem e-maila, najkasnije do 17.12.2019. godine – 12,00 sati.

Član 5.

Ovaj Zaključak stupa na snagu danom donošenja.

Na zahtjev vijećnika Eldara Šehića uslijedila je pauza od 11:55-12:00 h.

AD-6

Prijedlog Odluke o davanju saglasnosti za zaključenje Sporazuma o privremenom korištenju Gradskog nogometnog stadiona u Ilijašu

SANJA ZAGORAC-JOZIĆ – pomoćnica načelnika

Komisija za statut i propise je razmatrala Prijedlog Odluke o davanju saglasnosti za zaključenje Sporazuma o privremenom korištenju Gradskog nogometnog stadiona u Ilijašu i nije imala primjedbi na pravni osnov i pravno-tehničku usklađenost, s tim što predlaže da se u članu 1. iza riječi "Ilijašu" dodaju riječi "na period od tri godine od dana zaključenja Sporazuma". Predlagač je prihvatio ovu sugestiju Komisije.

Pravni osnov za donošenje ove Odluke nalazi se u članu 8. Zakona o principima lokalne samouprave koji definiše da raspolaganje i upravljanje imovinom nadležnot lokalnih zajednica. Takođe pravni osnov je definisan Statutom i Poslovníkom gdje su numeracijski nabrojane nadležnosti. U prilogu ove Odluke imate Sporazum i nadam se da će OV-e dati pozitivno mišljenje i usvojiti ovu Odluku.

MUHAMED HANDŽIĆ – samostalni vijećnik

Ovaj stadion nismo još uradili, a već ga dajemo na korištenje. Akt koji treba da donesemo ovdje, po meni, bi trebao da bude znatno opširniji i skoro za svaki član treba obrazloženje iz razloga što ima dosta prostora za dvosmisleno tumačenje svakog od ovih članova. Primjera radi, u članu 5. ili 7. treba definisati kome se stadion iznajmljuje, a prije toga da se napravi Elaborat za korištenje, upravljanje i održavanje Gradskog stadiona u Ilijašu. Taj Elaborat bi trebala Služba da napiše, a da ga ovjeri i potpiše ovo Općinsko vijeće. Ja ovo predlažem pomoćnici načelnika da ovo ide u ovom pravcu. U tom Elaboratu bi jasno pisalo ko su klubovi koji se finansiraju iz općine Ilijaš i pod kojim uslovima se daju na korištenje ti sportski kapaciteti. Npr. Bektić Mirza dođe sa ateltskim klubom da obavlja trening na stadionu, on ne zna, ako to nije napisano, koliko treba platiti za čišćenje, saniranje i svega onoga što je on koristio u toku jednog treninga. Dalje, ne zna hoće li imati slobodan termin u nekom periodu ako mu to nije napisano. Iz tog razloga ja predlažem da se uradi i jedan Elaborat koji će biti dostavljen uz ovo, jer dati nekome na korištenje jedan tako veliki objekat i da neko upravlja sa ovim objektom, a da ne snosi nikakvu odgovornost prema općini i organu koji mu je dao, nema mi baš neke logike i nikakvog smisla. O ovome treba dobro razmisliti pomoćnica načelnika da se da obaveza tom korisniku i da mu se da i odgovornost za ono što mu je dato na upravljanje, a ne da ovo budu samo neka finansijska podrška, "vjetar u leđa" ili da ne bude neka zavrzlama u koju će upasti sva ova naša sportska udruženja koja egzistiraju na općini Ilijaš, a jedini koji će imati korist od ovog stadiona i od ovog prostora bojim se da ne bude samo taj Nogometni klub Ilijaš. U tom pravcu bi trebalo o ovome razmisliti. Ja sam prvi diskutant, ali ima ovdje više kompetentnih koji će možda predložiti nešto i konkretnije prijedloge i mišljenja, ali za početak toliko, pa da čujemo i njih.

HALID DIZDAREVIĆ – vijećnik SDA

Čitajući ovu Odluku, a i na fonu priče vijećnika Handžića i ja imam nekoliko stvari koje želim da kažem, a imat ću i jedan amandman. Sigurno je jedna velika obaveza Nogometnom klubu Ilijaš da održava i upravlja ovim velikim kompleksom i zato je vjerovatno dat rok na tri godine, pa ćemo vidjeti u kom pravcu će ovo ići nakon te tri godine. Imam velikih dilema oko nekih stavova i članova i stavova ovog Ugovora tako da bih ja u članu 7. imao amandman koji će konkretno definisati neke obaveze. Znači, član 7. stav 2. koji kaže: "U Cjenovniku za usluge korištenja sportskih sadržaja, sportskim klubovima koji se finansiraju iz Budžeta općine Ilijaš obračunavat će se samo stvarni troškovi proistekli iz neophodnih priprema objekta za realizaciju sportskih aktivnosti", da stoji: "Sportskim klubovima koji se finansiraju iz Budžeta općine Ilijaš dat će se besplatno korištenja objekta za realizaciju sportskih aktivnosti". Obrazloženje: Imajući u vidu da je u Nacrbu Budžeta već stoji jedna stavka koja je namjenjena za održavanje Gradskog stadiona Ilijaš koja će biti vjerovatno direktno uplaćena Nogometnom klubu Ilijaš za održavanje, mislim da nema potrebe da pravimo dvostruke troškove kako klubovima koji egzistiraju i koji će koristiti te resurse ovih objekte iz člana 1. ovog Ugovora. Svakako, ukoliko je potrebno, ova namjenska sredstva možda povećati za Nogometni klub Ilijaš, uraditi jedan Elaborat da vidimo koji su to troškovi koji će zahtijevati održavanje jedne sezone Nogometnog stadiona Ilijaš i ići u tom pravcu.

MIRZA BEKTIĆ – vijećnik SDA

Nadovezat ću se na član 7. da se svim udruženjima koja egzistiraju na području općine

Ilijaš omogućiti korištenje ovog prostora bez naknade s tim da se slažem sa kolegom Halidom da možda treba povećati ova sredstva za Nogometni klub Ilijaš kako bi olakšali drugim udruženjima koji će tu dolaziti da se pripremaju, odigravaju utakmice ili se bave rekreacijom. Znači, da našim građanima omogućimo besplatno korištenje terena uz povećanje sredstava za održavanje Nogometnom klubu Ilijaš.

ALMIR ŠPIODIĆ – samostalni vijećnik

Želim da kažem par činjenica vezano za ovaj Sporazum. Kao što kaže kolega Halid, velika je obaveza i odgovornost Nogometnog kluba Ilijaš da upravlja i održava kompletan ovaj kompleks i prirodno je da se dadne ovom Klubu na upravljanje Gradski stadion Ilijaš. U potpunosti se slažem sa ovim diskusijama i podržavam i čestitam na ovom amandmanu Halida Dizdarevića, jer važno je da imamo kvalitetno održavanje, da se stvore uslovi za kvalitetno treniranje naše djece. Da bi to imali, moramo imati određena sredstva za to i nije jedini uslov imati ta sredstva da bi se to realizovalo, treba ta sredstva utrošiti namjenski kako su i planirana. Ne sumnjam u trenutno rukovodstvo Nogometnog kluba Ilijaš, ali ne znamo šta donosi vrijeme i da nam se ne bi desilo ne transparentno trošenje tih para u neke druge svrhe, umjesto u ono za šta su i naznačena. Hoću da kažem da se u potpunosti slažem sa diskusijom kolege Halida Dizdarevića i predlažem ostalim kolegama i kolegicama da podrže ovaj amandman da se omogućiti svim sportskim udruženjima koja su vezana za stadion, treniranje, rekreacije i održavanje utakmica, besplatno korištenje, a koji su na Budžetu općine Ilijaš. Ovdje prvenstveno mislim na sportska udruženja i kolektive koja egzistiraju na području općine Ilijaš, a naknadu treba naplatiti drugim udruženjima koja dođu sa drugih općina, kao što su se i nama naplaćivale naknade korištenja stadiona u Župči. Predlažem i ostalim kolegama da razmislimo i ovaj amandman prihvatimo.

HALID DIZDAREVIĆ – vijećnik SDA (replika)

Tačno je kolega da ovo što ste rekli je amandmanski navedeno, a pročitat ću još jednom amandman: "Sportskim klubovima koji se finansiraju iz Budžeta općine Ilijaš omogućit će se besplatno korištenje objekta za realizaciju sportskih aktivnosti". Želim da napomenem jednu stvar. Svakako da ova sportska udruženja treba da se domaćinski odnose prema tim resursima, odnosno objekta u vlasništvu općine Ilijaš i da sve nastale štete koje bilo ko napravi, a to će se regulisati ugovorom sa Nogometnim klubom Ilijaš i međusobnim pravima i obavezama i kao takav treba da prođe kroz Komisiju za sport i Službu za društvene djelatnosti gdje će se tačno definisati uslovi i način korištenja tok objekta.

SANJA ZAGORAC-JOZIĆ – pomoćnica načelnika

Zahvaljujem na svim prijedlozima i dobronamjernim sugestijama. Promaklo mi je da kažem da smo mi ovakav Ugovor imali u prethodnih pet godina sa Nogometnim klubom Ilijaš kome takođe na pet godina bio dat ovaj stadion na korištenje i da je razlog za ovaj rok od tri godine upravo to što je perspektiva da ćemo mi u naredne tri godine završiti ovaj naš grandiozni objekat tribina sa pratećim sadržajima i da tada taj resurs zaista prevazilazi kapacitete jednog udruženja da upravlja jednim takvim resursom i mi očekujemo da će dalje upravljanje preuzeti naša JU KSC i Radio Ilijaš. Znači, ovo je jedan privremeni period kada će Nogometni klub Ilijaš koristiti ove travnate terene glavnog i pomoćnog terena. Ukoliko ste dobro pogledali ovaj Sporazum možete vidjeti da je članom 7. definisano ovo vezano za diskusiju vijećnika Handžića da se uradi jedan Elaborat, da je Nogometni klub u roku od 30 dana od dana zaključenja Sporazuma dužan napraviti Pravilnik o načinu

korištenja Gradskog nogometnog stadiona, a sastavni dio Pravilnika biće cjenovnik koji će se odnositi na korištenje resursa od strane sporstkih kolektiva i udruženja koja, sudeći po ovome da će amandman vijećnika Dizdarevića biti prihvaćen, koji nisu korisnici Budžeta općine Ilijaš. Takav Pravilnik smo mi već imali, na njega je pozitivno mišljenje dala nadležna Služba za društvene djelatnosti i Komisija za kulturu i sport Općinskog vijeća Ilijaš i mi nemamo ništa protiv ukoliko želite da nakon davanja mišljenja Službe i Komisije, Općinsko vijeće razmatra taj Pravilnik o korištenju sa cjenovnikom da saglasnost za njegovu upotrebu. Znači, ukoliko se vi dogovorite, predlagač nema apsolutno ništa protiv. Ovaj amandman vijećnika Halida Dizdarevića, Mirze Bekića i Almira Špiodića ima smisla zato što smo mi u Budžetu za 2019. godinu prvi put odredili Odlukom o godišnjoj raspodjeli sredstava namjenska sredstva za održavanje sportskog objekta Nogometnom klubu Ilijaš i Nogometnom klubu Jedinstvo, jer do sada su njihovi troškovi održavanja tekućeg bili na uštrb sredstava za redovan i takmičarski rad. Imali su tu troškove vode, struje, košenja, valjanja, markiranja terena i obzirom da sada ta namjenska sredstva su već obezbjeđena ima smisla da klubovi koji su iz te branše nogometa, škola fudbala, koristiti resurse Gradskog stadiona bez naknade, naravno uvažavajući da su terminski planovi Nogometnog kluba Ilijaš prioritet. Mi, kao predlagač, nemamo ništa protiv da se taj amandman ugradi u Sporazum i da Sporazum u takvoj formi bude i usvojen, ali još jednom razmotrite da li će Općinsko vijeće davati saglasnost na Pravilnik o korištenju resursa i na cjenovnik o uslugama za korištenje.

Diskutanata po ovoj tački dnevnog reda više nije bilo, pa je OV-e uz prihvaćeni amandman u članu 7. Sporazuma, jednoglasno donijelo

Odluku o davanju saglasnosti za zaključenje Sporazuma o privremenom korištenju Gradskog nogometnog stadiona u Ilijašu

AD-7

Nacrt Odluka o:

- a) usvajanju Regulacionog plana "Apartmansko naselje Mrakovo 1" – Ilijaš
- b) provođenju Regulacionog plana "Apartmansko naselje Mrakovo 1" – Ilijaš

MELIHA AVDIBEGOVIĆ – pomoćnica načelnika

Odluka o pristupanju izradi Regulacionog plana Mrakovo 1 donesena je u maju 2017. godine, a to govorim i iz razloga što je ta Odluka donesena na osnovu Zakona o prostornom uređenju, a u međuvremenu je donesen novi Zakon o prostornom uređenju, ali smo mi nastavak procedure donošenja Plana na osnovu starog Zakona. Danas imamo odluku o usvajanju i Odluku o provođenju Regulacionog plana "Apartmansko naselje Mrakovo 1". Shodno Zakonu o prostornom uređenju nosilac pripreme Plana u ovom slučaju je općinski načelnik utvrdio je Nacrt Plana – Odluku o usvajanju i Odluku o provođenju i evo dostavljena je Općinskom vijeću na razmatranje i stavljanje na javni uvid i Javnu raspravu. U prijedlogu ovih Odluka je Zaključak koji će pročitati predsjedavajuća. Ovdje se radi o manjem broju objekata tj. 16 stambenih objekata gdje nema izgrađene infrastrukture i iz tih razloga se donose ovi Regulacioni planovi. Parcele su cca 400 m², objekti maksimalne spratnosti suteran, prizemlje i sprat. Danas se usvaja Nacrt urbanizam i saobraćaj, a u prijedlogu Plana ćemo imati izgrađenu kompletnu infrastrukturu od vodovodne mreže, kanalizacije i ostale infrastrukture. Komisija za prostorno uređenje nije imala primjedbi, a Komisija za statut i propise je predložila da se u preambuli Zaključka za Statut općine Ilijaš pored upisanog "Službene novine Kantona Sarajevo", broj 20/09 upiše

i broj 46/18 što je predlagač učinio.

ALMIR ŠPIODIĆ – samostalni vijećnik

Ja sam otpočetka skeptičan kada su u pitanju Regulacioni planovi kojim se definišu apartmanska naselja i opet kažem i ponavljam iz razloga što nismo do kraja definisali da zaštitimo našu infrastrukturu i našu imovinu. S tim u vezi, smatram da bi trebali napraviti analizu i ne mogu tačno da odredim na kojoj lokaciji se nalazi ovo naselje, a interesuje me da li pristupni put do ovog apartmanskog naselja vodi kroz naseljena mjesta gdje žive naši građani. Prije nego što počne izgradnja tog naselja, treba napraviti analizu u kakvom stanju se nalazi putna komunikacija koja vodi do tih apartmanskih naselja, da li je to asfalt i u kakvom je stanju; da li je to makadamski put i u kakvom je stanju. Prije nego što se počne bilo šta graditi u tom naselju treba put asfaltirati da ljudi ne bi trpjeli danima prašinu od stotinama kamiona koji provlače materijal, kao što imamo problem u Sovrlama. Očekujem da će mi Služba odgovoriti i kakve će konkretne mjere poduzeti. Nemam ništa protiv bogatih Arapa – investitora koji grade apartmanska naselja, ali se protivim tome što se ne zaštite naši građani od bahatih investitora koji uništavaju ono što smo mi do sada gradili. Znamo mi kolika je borba da se asfaltira ulica od nekih 300 m i koliko je kvalitetan taj asfalt. Ja neću glasati za ovaj Nacrt Odluka iz razloga što nismo do kraja definisali kako da zaštitimo našu infrastrukturu i imovinu. Bilo bi dobro da u nekom narednom periodu na Vijeću definišemo na koji način mi to možemo zaštititi. Da li je to pregled stanja prije izvođenja radova da mi imamo sliku u kakvom stanju smo mi njima dozvoli da idu našim putevima i na kraju kada se to završi, u kakvom je to stanju.

ALMA OMEROVIĆ – predsjedavajuća

Dala je na glasanje predloženi Zaključak. Općinsko vijeće je većinom glasova donijelo

ZAKLJUČAK

1. Usvaja se Nacrt Odluke o usvajanju Regulacionog plana "Apartmansko naselje Mrakovo 1" i Nacrt Odluke o provođenju Regulacionog plana "Apartmansko naselje Mrakovo 1".
2. Javni uvid na Nacrt Odluke o usvajanju Regulacionog plana "Apartmansko naselje Mrakovo 1" i Nacrt Odluke o provođenju Regulacionog plana "Apartmansko naselje Mrakovo 1" održat će se u periodu od 29.11.2019. do 13.12.2019. godine u kancelariji broj 20. općine Ilijaš II sprat, a Javna rasprava na Nacrt Odluke o usvajanju Regulacionog plana "Apartmansko naselje Mrakovo 1" i Nacrt Odluke o provođenju Regulacionog plana "Apartmansko naselje Mrakovo 1" održat će se 16. decembra (ponedjeljak) 2019. godine u velikoj sali općine Ilijaš (III sprat) sa početkom u 14:30 h.
3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš dostavlja se općini Ilijaš, Službi za prostoro uređenje i zaštitu okolišta, koja organizuje i sprovodi javnu raspravu.
4. Služba za prostorno uređenje i zaštitu okolišta dužna je nakon sprovedene Javne rasprave da podnese Izvještaj Općinskom vijeću Ilijaš, o rezultatima Javne rasprave

koji sadrži primjedbe, prijedloge i mišljenja nisu prihvaćeni.

AD-8

Prijedlog Rješenja o:

- a) razrješenju člana Komisije za izbor i imenovanje
- b) izboru člana Komisije za izbor i imenovanje
- c) razrješenju člana Komisije za administrativne poslove, budžet, privredu, finansijska i ekonomska pitanja
- d) izboru člana Komisije za administrativne poslove, budžet, privredu, finansijska i ekonomska pitanja

Diskutanata po ovoj tački dnevnog reda nije bilo, pa je Općinsko vijeće jednglasno donijelo

Rješenja o:

- a) razrješenju člana Komisije za izbor i imenovanje
- b) izboru člana Komisije za izbor i imenovanje
- c) razrješenju člana Komisije za administrativne poslove, budžet, privredu, finansijska i ekonomska pitanja
- d) izboru člana Komisije za administrativne poslove, budžet, privredu, finansijska i ekonomska pitanja

AD-9

Informacija o stanju privrede, poljoprivrede i samostalnog privređivanja

Diskutanata po ovoj tački dnevnog reda nije bilo, pa je Općinsko vijeće primilo k znanju

Informaciju o stanju privrede, poljoprivrede i samostalnog privređivanja

Nakon što je iscrpljen dnevni red, predsjedavajuća Alma Omerović zaključila je tridesetšestu sjednicu OV-a Ilijaš u 12:40 h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ

Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20063Q

